

四庫全書

集部

欽定四庫全書

明文衡卷七十六

明程敏政編

神道碑

故文淵閣大學士兼左春坊大學士贈榮祿大夫少
師禮部尚書諡文穆胡公神道碑銘 楊士奇

太宗皇帝御天下二十有三年文武之臣各展其才能
達諸事功若竭誠効力始終不渝者其身雖沒所以寵

眷之率有進而不衰其文臣遭遇之盛者文淵閣大學士兼左春坊大學士胡公尤著者也公初以進士第一為翰林修撰階承直郎又明年太宗皇帝入正大統陞侍講踰月改侍讀進承德郎永樂二年陞右春坊右庶子階奉議大夫仍兼侍讀四年進翰林學士兼左春坊大學士階奉政大夫進文淵閣大學士仍兼左春坊大學士又三年得疾且劇上數命大醫集衆醫之良者往視日遣中使問疾既卒上悼嘆不已命工部具棺禮部

賜祭者再贈資善大夫禮部尚書諡文穆國朝文臣有
謚自太子少師姚公廣孝與公始也又命官給舟還其
喪命有司治祠墳時仁宗皇帝監國南京公之喪過焉
遣官臨祭賜賻甚厚葬畢其子入謝官其長子種為翰
林檢討仁宗既嗣位追念公舊人加贈榮祿大夫少師
禮部尚書遣官諭祭且厚賜其家公遭逢二聖恩備始
終何其愈久而愈盛也公居官敬慎在上前承顧問應
對必盡誠必據理而忠厚為本未嘗及人過失事於奉

旨制勅視草即有所見必具可否以聞多見采納所撰進文字上知出公筆輒稱善所奏對語及所治機務退未嘗出口雖親厚不敢私涉有問蓋自守之嚴有素事太宗皇帝十有七年凡巡幸北京親征北邊翰林率公與楊公勉仁金公幼孜在扈從信任甚篤禮部郎中周訥建請封禪羣臣亦多言此太平盛事上皆不聽時獨公之言與上意合既退作封禪頌奏之丁母憂召還上問百姓安否對曰安但郡縣窮治姦惡外親為民厲遽

詔罷之其兼春坊也小心盡誠多所裨益故尤為儲君所厚而沈靜謙約以滿為戒未嘗干人以私人亦無敢以私干之兩考京畿鄉試四為廷試讀卷官鑒別公明奉勅修高皇帝實錄及五經四書性理大全書皆為總裁志於扶植名教獎掖善類果於義事於利不苟取與未嘗一比匪人所與交必輔之於善不善去之不復顧小人有不滿公者屢造言毀之賴上深知之不聽遽黜毀者而公自執愈堅意度蕭散雖身處榮祿未嘗一日

忘山林幽澹閒遠之趣公退閉戶讀書賦詩而已初名廣廷試傳臚更名靖永樂初復舊名其字光大其齋居名晃菴因以為號公十數歲喪父已有志問學內浸漬其母訓外則日受從祖子貞先生之教故德器不凡居家篤倫誼處鄉曲恂恂執恭讓既冠薄遊閩中閩之前輩君子率忘年與交歸而從黃伯器先生講論得所歸宿之地而日進焉其學博究經史百氏下逮醫卜老釋之說亦皆旁通而用志性命道德之旨晚益有造詣為

丈援筆立就頃刻千百言沛然行雲流水之勢賦詩取
適其性情近體得盛唐之趣工書法行草之妙獨步當
世四方重其文翰求者日接踵戶外雖無厭倦意然非
其人不苟予其卒以永樂戊戌五月八日春秋四十有
九其先自金陵徙廬陵宋忠簡公銓其十二世祖也曾
祖鼎亨祖彌高父子祺累官延平知府母吳元進士永
豐縣丞師尹之子永樂中贈公父翰林學士封母太宜
人公娶夏初封宜人洪熙初進封夫人子男三長即種

次穆次穗女四長嫁陳年次嫁鮮禎亮次嫁宋懷孫男
六女七所著文章有晁菴集扈從集若干卷公與士奇
同郡同官知契最深未卒前二年有後死則銘之約既
卒其孤又奉臨終之命索文刻墓石嗚呼士奇先公生
五年豈謂竟銘公墓哉蓋今九年乃克成之銘曰經國
所資文武竝施維武以靖維文以治巍巍太宗統御九
有任武暨文如左右手公職詞垣十有九稔秉恭執勤
司帝之制玉冊金簡天章龍文光華日星帝宣帝仁萬

幾燕閒清問前席公所入告惟帝時懌公所蓄志寬惠
被下沕穆泯焉密贊鴻化春宮輔德平直之行二聖惟
明燭鑒公誠好文之朝儒林之首人聳其瞻公眎無有
泊虛之存簡肅之度彼其何心有好有惡仲尼有言善
者好之善有好公沒思不衰寵章駢蕃貴終猶始始終
之全曠代其幾金螺在左文川在右埋璧有光上貫牛
斗墓道之碣為尋有多最行琢辭來者是儀

少保戶部尚書贈特進光祿大夫太師諡忠靖夏

公神道碑銘

公姓夏氏諱原吉字維詰其先家于饒州曾祖復祖希政元末為湖廣行省都事兵亂死之考時敏為湘陰縣儒學教諭遂家湘陰公自幼端厚好學年十三教諭公沒益知自勵母夫人廖守節教子公終父喪即出教里塾取束修以資養而率其二弟恭侍婉愉得母夫人歡心出入鄉閭其長老皆忘年賓禮之時已負鉅人度喜怒不形里少年嘗被酒侮慢公里人共擊之詈之曰汝

小人不知鄉有君子耶有鬼物白晝附人言禍福驚動里中或強公往觀卒無所言他日復有言或問之故曰夏公端人吾不可以近公一無所動心洪武庚午歲以詩經選鄉貢入大學遂擢戶部前四川司主事授承直郎進承德郎曹務叢脞凡倉庾府帑之出入簡牘之著悉有條理同官後至於事有未通者咸以質公日環左右公雖紛冗必為之盡心蓋人人德公如師陞戶部右侍郎授嘉議大夫巡撫福建所過郡邑考察吏治咨訪

民隱公明寬大人咸悅服太宗皇帝入正大統轉左侍郎逾月陞戶部尚書投資善大夫永樂初蘇松諸郡大水命公往治發浙西兵民十數萬疏決壅滯自松江黃浦東北以達于海水患乃息而撫恤曲當人不言勞又撫綏其飢民奏發廩三十餘萬石賑之散給有方民賴以濟進資政大夫初建北京採宮殿材於東南命公自南京抵北京督視運送給以錦衣衛官校且命有不率命便宜行事公於號令中備矜恤之意人人効用太宗

巡狩北京公預扈從命兼行在禮部都察院事歲餘車
駕親征北方今上以皇嫡長孫留守北京命公輔導庶
事修舉京師肅然太宗還良喜賜公鈔千緡綵幣四表
裏羊酒鞍馬自是屢奉命侍今上有司奏公與吏部尚
書蹇公歷官九載皆賜勅嘉獎有淳良篤實如古名臣
之諭太宗親宴之別殿無幾賜誥命追封祖考皆為資
政大夫戶部尚書祖妣為夫人封母為太夫人重修太
祖皇帝實錄命公監修書成賜鈔織金文綺衣文綺表

裏北京宮殿成奉勅召仁宗皇帝及今上于南京二聖
喜公至賜宴勞及鈔白金鞍馬北邊復聞警太宗皇帝
將親征公言今邊儲不足請遣將無煩六師忤旨罷官
仁宗皇帝嗣位即日復公戶部尚書公以母喪未終辭
仁宗曰國家不幸有大事正朕與卿等協心比力之時
如卿以親喪辭則朕亦未當在此公乃不敢復言遂加
少保仍兼戶部尚書賜玉帶今上正位東宮加公兼太
子少傅少保尚書二職如故賜誥命追封曾祖祖考皆

為榮祿大夫少保兼太子少傳戶部尚書曾祖妣祖妣
妣皆一品夫人賜銀章一其文曰繩愆糾繆且諭公曰
朕有過舉卿但具奏來以此識之朕不難於從善賜鈔
萬緡御用米二十石胡椒二百斤公感知遇之厚鞠躬
小心靡或不盡修太宗皇帝實錄命公監修仁宗皇帝
崩時今上監國南京至則喪禮及即位之儀皆具皆公
一人所預定上既嗣大位公以舊輔尤重倚注公亦孜孜
惟謹寵賚日盛修仁宗皇帝實錄仍為監修庶人高

煦反上親率六師擒之公預扈從還賜白金文綺等物甚厚賜銀圖書一其文曰含弘貞靜蓋褒公之德云明年扈從巡邊既還上念少師蹇公及公等四人者皆春秋高欲優逸之賜勅嘉勞命輟職務而仍其祿朝夕侍上備顧問謀議而恩遇益厚兩朝實錄成賜白金織金羅衣文綺表裏鞍馬賜宴明旦入謝暮歸第得疾遂薨宣德五年正月二十七日也壽六十有五歲上聞訃震悼遣禮部尚書胡濙賜祭贈特進光祿大夫太師賜諡

忠靖賻鈔萬緡勅有司營喪葬官其子瑄為尚寶司丞
仍復其家朝臣自公侯貴戚下至郎曹將校咸往弔祭
衛卒巷氓亦有嘆息至流涕者公天性至孝友其弟原
啓原禮皆厚原啓沒愛其子如子讀書鄉校時教諭史
九韶雖非授業師遇之必拜雖貴不變既貴九韶陞教
國子月恒分之祿九韶將老朝廷從公請命致事與人
交久而敬平生故人在患難率賙給之遇士之貧者振
之有顛躓失所者援之德雖微必報而未嘗存怨惡心

接人溫然處事善善長而惡惡短襟宇靜深閨廊不見
涯涘嘗有從隸汚公金織賜衣懼欲逃者曰汚可浼何
懼為有吏壞公所寶硯石匿不敢見公召吏諭之曰物
皆有壞吾未嘗惜此慰遣之於時卿大夫雅量推公第
一知者蓋比公於王子明韓稚圭之度其在上前所言
必歸仁厚臨政必酌大體其預宥密雖泯然無迹蓋有
陰受其德者矣故不問貴賤疏戚識不識皆知其為善
人長者喜為詩四方士重公名得其一篇一詠藏以為

榮公配鄭氏有賢德再封皆夫人子男三琬琰瑾女一
嫁虞瑞琬與虞氏女皆先卒公卒之三月歸葬湘陰其
家以墓碑屬余余與公同朝三十年晚益親厚相知又
嘗為余道其平生余豈意遂志公之墓耶銘曰沂夏厥
初以國為氏行于會稽縣縣厥系太末之邑後來徙居
暨唐中和復徙于番懿夏之世逢掖其服詩書有承德
善有績轉鄂而潭自公祖考積厚必發公奮起紹燕歌
鹿鳴來與計偕官任其賢政用其才繇司徒屬暨掌邦

教寅恭小心寬仁允蹈叅決大議游任重負不亟不徐
雍容雅度如彼喬嶽截焉弗移其氣默運澤潤良多祇
事列聖既四十載夷險一道其爲几几國有老成堂有
柱石胡不憖遺當寧興惻既榮且哀隆隆寵光於乎忠
靖沒世不忘

奉天靖難推誠宣力武臣特進榮祿大夫柱國太
保陽武侯追封鄴國公諡忠武薛公神道碑銘
宣德五年五月太保陽武侯薛公奉命城隆慶永寧赤

城獨石竣事將歸以疾聞上遣中官以御醫往視且賜
勅諭勞至京猶力疾入見上慰諭再三既歸第日賜御
藥遣中官臨問無幾竟不起七月二十三日也訃聞上
震悼親為文祭之追封鄆國公賜諡忠武詔有司治喪
葬凡喪葬之儀皆優等蓋特恩云公諱祿姓薛氏世家
山東膠州之新興社曾祖考諱安妣劉祖考諱大妣金
考諱遇林妣張公兄弟六人而公第六自少傑特有大
志未冠籍戎伍上官皆奇之從北征金山及哈勒哈之

地又從征伊勒敦山鵲爾布哈等處自是屢出西北二
邊涉萬里而還太宗皇帝舉兵靖內難公首從義旗攻
九門克薊州遵化援密雲攻雄縣追敵鄭州咸奮勇先
驅以一當百戰真定公生擒敵左副將軍駙馬都尉李
堅超陞燕山右護衛指揮僉事賜白金文綺從援永平
攻下大寧富峪會州寬河時南兵已圍北平城公還先
遇其哨騎薄戰敗之車駕繼至從戰鄭村埧敵大敗陞
指揮同知從克廣昌蔚州攻大同率兵前哨獲敵人馬

遂從南征大戰白溝河追奔至濟南陞指揮使從克滄
州大戰東昌公以五十騎前哨遇敵兵數百與戰敗之
獲馬三十餘疋敵悉衆來追公復奮戰大敗之獲馬二
百餘疋敵於威縣及深州伏兵以要旋師皆擊走之從
戰夾河大捷戰滹沱河右軍力屈公率衆馳赴之出入
敵陣數十合戰敵敗走公追至夾河斬馘無算獲馬五
百餘疋明日戰單家橋公馬蹶為敵兵所得拔刀斬敵
兵復上馬督戰遂敗敵將平安軍以次攻下順德大名

彰德及攻西水寨公生擒敵都指揮一人斬獲尤多從
攻東阿東平汶上皆下之繼戰淝河大店小河汴隄靈
壁率勇先諸軍遂渡淮渡江從車駕入京師太宗皇帝
為臣民推戴既正大位論功行賞陞驃騎將軍後軍都
督府都督僉事以其官秩贈三代永樂六年陞都督同
知八年從車駕北征至玄溟河以功進榮祿大夫右軍
都督府右都督兼左軍都督府事以其官秩加贈三代
時四方選至幼軍數萬悉命隸公操習十二年從車駕


北征十五年初建北京宮殿命公董營繕十八年成加奉天靖難推誠宣力武臣特進榮祿大夫柱國封陽武侯食祿千五百石追封其三代皆侯爵賜誥券二十一年從車駕北征還奉命討捕湖州叛寇二十二年復從車駕北征是年八月仁宗皇帝嗣大位加公太子太保子孫世襲侯爵奉命巡北邊適敵至雲州公率兵追至大松嶺斬獲甚衆事聞賜勅嘉獎遣中官及鴻臚卿即軍中勞之既還賜白金鈔幣加歲祿五百石洪熙元年

佩鎮朔大將軍印率師巡北邊宣德元年庶人高煦反車駕親征命公為前鋒先一日圍其城罪人既得留公撫綏城中軍民還賜銀幣甚厚明年秋從車駕巡邊出會州邂逅敵侵塞下與戰敗之生擒其長斬獲其餘衆遂鎮薊州永平冬還賜銀幣加厚四年率師護兵餉開平者再五年春佩鎮朔大將軍印巡邊至奇黃嶺遇敵拒戰悉斬之盡收其家口孳畜陞太保錫鈔幣居三月董築城之役益從公之言以便戍守公平居無事未嘗

忘危每計邊務言之亶亶或謂其瑣屑者終不為變蓋其志奉國惟恐不盡為將勇智兼備常先事籌畫用心之至以夜繼日故所嚮成功未嘗敗北間一二臨陣中矢石裹創赴關有進無退其率師所過紀律嚴明秋毫無犯而撫恤士卒人人歸心若董繕作規置有方力不煩費功率堅久人亦罕及蓋一代之興必有一代之臣公祇事三聖涉歷多用志篤鞠躬盡瘁以效臣職故能建功國家流光簡冊致身貴富垂慶後昆其非古名將

之流而今之不可多見者歟公壽七十有三年其配李
累封至侯夫人子男三長勲先卒次某次某孫男三長
誠先卒次某次某以是年十月三日塋公于某鄉某原
銘曰明聖之興有命自天必有輔翼名世之賢氣機翕
會雲龍風虎有勲有烈左文右武桓桓薛公始奮從義大
呼迅馳金戈鐵騎智明幾先勇蓋萬夫疇其櫻之析朽
摧枯宗社載安功書冊府在帝左右股肱心膂公於事
上一誠不貳知竭臣職死且無怠公於馭衆有紀有綱

撫如春和令如秋霜歷事三聖麟衣蟬冠廷有老成國
有屏翰丹書鐵券傳襲來裔公如長城曷不百歲英靈
升遊九原在此太史作銘式昭無已



明文衡卷七十六

欽定四庫全書

集部

明文衡卷七十九

詳校官庶吉士臣翁樹培

助教臣常循覆勘

總校官降調編修臣倉聖脉

校對官編修臣勵守謙

謄錄監生臣田安仁

欽定四庫全書

明文衡卷七十七

明 程敏政 編

神道碑

奉天翊衛推誠宣力武臣特進榮祿大夫柱國追
封平江侯諡恭襄陳公神道碑銘 楊士奇

太宗皇帝初自北藩靖內難至江上都督陳公瑄具舟
迎濟內難平上正大統錄功賜公奉天翊衛推誠宣力

武臣特進榮祿大夫柱國封平江伯賜誥券陳氏家合
祀其先世具余所著其先公墓碑公字彥純自少穎敏
不凡好善惡惡內篤孝行洪武中侍父官成都習兵畧
精騎射以武臣子選侍大將嘗從出郊遙望孤鴈雜鷺
羣命衆從者射不中最後命公發一矢斃之有鷁翔於
上命公射應弦而墜自是屢試皆奇中衆大服而公不
自為能朝廷命總兵者作蜀府宮城遣將伐材於山所
行失律且材不中度又所經瘴地士多死總戎察公可

用遂命之公善撫綏明號令別取善道七百里以入先期而還士不病所得材皆適用總戎者嘉之又命董繕作具有條理遂從征南番巖州中亭及散毛鎮南咸建勞績代父職為成都右衛指揮同知父坐舊累謫戍遼陽公伏闕奏請代行特詔父子並免復職衛卒數輩饗誑狙詐挾制上下為衆患公次第悉去之善類以安從征越雋討建昌酋長伊呀特穆爾踰梁山平天星寨破寧番諸蠻駐西河口諭降夷人數千從總帥復征鹽井

平三山寨及小伯夷進攻布木威寨據要害立堡以斷賊路官軍分三隊進公居中已而左右兩隊弗支奔還公所統僅百餘人冒險先登賊數千圍公公下馬率衆且射且斫賊疲稍却公亦傷足累創進戰自己至酉賊敗走公全所統而還復從征餘寇賈哈喇時寇衆數萬據嶮以拒官軍分三道公軍後進由番西涉達珠河得間道乃出奇兵作浮梁渡河既渡撤梁以固士志遂壓寇境寇憑嶮迎敵一日十三戰奪其嶮明日復力戰凡

七合寇大敗遂入其壘簡銳卒出哨令望見前軍旌旗
即舉砲俾知已敗寇仍遣五百軍斷寇走路寇窮出降
械送賈哈喇京師撫輯其餘衆公及麾下加被陞賚從
蜀獻王巡邊招撫邊人兼理茶馬之政邊人悅戴灌口
都江堰壞民苦水患公修其隄防躬督工作為堅久計
矜恤無告出貲置義田二百畝於成都積所入租凡貧
不能衣食不能婚嫁及死不能斂葬者皆給之會雲南
兵征百夷以功陞四川行都司都指揮同知遂進右軍

都督府都督僉事太宗皇帝知公才可任時北京軍儲不充命公歲董運百萬石道海給之公措置井井剏建百萬倉於直沽尹兒灣城天津衛籍兵萬人戍守公善任使均勞逸秋豪無取於下凡漕途姦弊掃滌一清漕舟所經海島番人畏憚官軍悉閉匿公下令俾出為市而遣官監臨平其直軍無敢譁人兩便之舟還值倭寇劫沙門島公率衆追至朝鮮境上焚寇舟殆盡寇以殺溺死者甚衆奉命率舟師於閩海備倭寇者三海溢坍

設隄岨起楊之海門歷通泰北至鹽城凡八百里奉命
以四十萬卒修之航海至者茫洋莫知所停泊徃徃膠
淺公於太倉相可泊處以二十萬卒築高邱二十丈延
亘十里為表識衆便之稱寶山事聞上親製文樹碑焉
既建北京罷海漕浚濟寧臨清河通南北往來仍屬公
董餉運公建議造淺艦二千艘初歲運二百萬石為之
有方後增至五百萬石國用以足若疏清江浦引水由
管家湖入鴨陳口達淮以免淮河風濤之患就管家湖

築隄亘十里以便引舟浚儀真瓜洲二壩湖港之堙鑿
呂梁徐州二洪巨石以平水勢築沛縣刁陽湖濟寧南
望湖長隄開泰州白塔河通大江築高郵湖隄隄內鑿
渠亘四十里以通舟南北造梁以便陸行自淮至臨清
相水勢高下建牖四十有七以時啟閉皆舟楫通行永
遠之利於淮濱作常盈倉五十區以貯江南輸稅於徐
州臨清通州皆建倉以便轉輸慮漕舟昧河深淺自淮
底通州濱河置舍五百六十八所舍置卒俾導舟可行

處緣河隄鑿井樹木以便夏月行者凡於事慮之周而
為之果仁宗皇帝初臨御下詔求言公首言七事大概
謂南京國之根本宜為久遠鞏固之計選將益兵以嚴
守備長民長兵皆宜擇賢能然後政舉而下不失所賢
能在推舉推舉在覈實乞選朝臣之公正者分巡天下
考察百司政事得失進廉能黜貪鄙則官得人而治可
興今府州縣學教官多不得人乞令風憲考察罷黜別
選令中外軍伍多缺蓋由所管頭目私役擾害不勝致

其逃逸乞勅都府兵部都司嚴切禁約就行清理老疾者令戶丁代逃逸者責限追捕戶絕者驗實際豁伍籍又邊防之要在兵食足近歲如開平等處城不足兵兵不足食所守何由完固乞選武臣之有方畧者授以精兵足其衣食給之堅利器械俾日教習如有沃壤令兼務耕守令漕運惟江西湖廣浙江及蘇松諸郡去北京甚遠漕河又有洪腫淺凍之阻往復踰年雜費數倍正糧上逋公租下妨農務乞自令令運於近便淮安徐州

等處收貯別令官軍運至北京則民力可蘇農務不妨
各處官軍每歲漕運畢財力殫乏到家又修理壞船運
來歲糧勞動可憫其所管頭目又加別役以重困之乞
行禁約今後漕運軍士不得再有別役馬船快船惟二
三百料者可行於漕河所載不過五六十石每船已有
額設水夫今又於緣河拘集軍民聽候其至接遞聽候
日久衣食艱難有至行丐者乞自今罷之上覽奏嘉嘆
命有司咸即施行賜勅獎諭有老成忠愛篤誠之褒加

欽定四庫全書

明史稿
卷七十七

之重賚賜誥追封其曾祖省三祖重一考聞皆平江伯
曾祖母孫祖母朱嫡母王生母王故妻湯皆夫人命子
孫世襲宣宗皇帝臨御命公鎮守淮安兼督漕運公至
察宿弊之為民厲者悉革之豪猾姦宄皆斂避境內以
寧時已嬰疾而躬勤旦暮靡有滯事疾間入朝深被嘉
勞賜宴賚還至淮安無幾疾復作上聞特勅勞問時子
儀在侍衛令挾醫馳驛往侍竟薨宣德癸丑十月十一
日也春秋六十有九計聞上悼嘆輟視朝一日追封平

江侯謚恭襄賜祭命工部營塋公為人闇爽英毅弘度
偉畧稠人廣會譚論亹亹倫輩推服公餘披閱載籍考
知徃古成敗治亂之故喜近逢掖士時相講議善交際
能推利為義所至以濟人為心多所建置人用德之不
忘家有樂善堂恒舉鄒孟氏仁義忠信樂善不倦之語
以勉子孫配某氏封夫人子男五佐襲平江伯後公數
歲卒次儼次儀今為勲衛好文事精武畧次倫次侃女
三李芳江陰衛指揮同知張英其婿也一未行孫男三

裕今襲平江伯祐祿女七公塋以薨之明年三月墓在江寧縣大山之原余與公同朝三十餘年相知且好於是儀以狀求著神道之碑故按狀叙而銘之銘曰

緊公挺出何桓桓武兼勇智追前間材藝夙試卓寡倫
我我三品承考勲蠻溪獠峒獫狁羣負嶮弗擾獐且趨
公奮掃刮迅拔塵湔滌羣姦寧邊民有戢繫望齊我岷
歛徵來束衛宸垣遭承興運效駿奔錄勞疏封昭鴻恩
貂蟬鞶玉衣繡麟報賜志企古蓋臣單心畢慮靡夕旰

滄溟茫洋渺涯津歲漕萬艘奄然臻有梗於海威赫震
斬鯨戮鱷焚甲鱗崇表海岸亘長雲雲章龍彩天垂文
南賦北貢艱以辛踰淮歷濟底天津疏堙鑿堅劬且勤
坦行如砥戚者忻猗嗟公篤孝與仁厥施諸時績弗泯
愛國亦有嘉謨陳功載冊府被後昆大江之陽歸有墳
太史銘之昭不刊

封榮祿大夫少保戶部尚書兼武英殿大學士黃
公神道碑銘

黃羸姓顓頊之後以國為氏勲業文行代有聞者永嘉之黃自宋御史檢法袞以科第起家令緒有傳世篤儒業檢法孫修職即諱適道生元明正書院山長諱南山長生松陽縣學教諭諱應發教諭生諱通娶屠氏生公諱性字思恭自幼穎悟不凡蚤喪父祖母劉躬自撫育遣從學明師時已卓然有立志讀書必尋究大義十五鄉長老試所業命賦新竹大見賞異而操行清潔元季兵亂方國珍竊據溫台署官屬蟻附之徒率勢縱赫赫

動閭里或勸公仕正色叱之遂裹足不出屬歲大祲家
益落躬儉約以率下而養親必豐國家既定宇內家始
復振推其餘以濟親戚鄉黨者率視為分內事內弟王
時中孤寡依公公資遣之學後升太學生公皆輟已資
之時中既授官坐事當沒其家有司以同籍併沒公家
公叩有司求得先祠神主及先世傳文以付其親戚曰
保藏之如黃氏先德未泯吾當還則此不可失也而求
檢法所受告身或言燬矣大慟幾絕既至京白其情於

朝得釋歸而告身實未燬亦復則又大喜曰復此萬金不足重也公於學自幼至老不倦閒居潛心載籍喜為詩不事雕琢務以理勝遇名人制作有會意者手自抄錄晚亦喜譚道學嘗書邵子安樂窩吟置齋壁時諷詠以自適永樂十年以子淮貴封奉政大夫右春坊大學士時淮侍仁宗皇帝監國屢問公安否嘗賜瓊玉膏一器洪熙初進封榮祿大夫少保戶部尚書兼武英殿大學士淮奏請分少保祿給於鄉以供養從之天下聞而

榮豔焉於是公年已九十鬚髮半白而齒落復生雖重
聽而日益明步履强健前二十年嘗預作壽藏是旦甘
露降其前之松栢識者以為公之壽徵至是而驗公雖
貴益惇謙謹雖五尺童子接之以禮溫裕有容犯未嘗
校隣惡少嘗侵公䟽地公弗校而侵不止有譏公愼者
公若罔聞惡少後侵官地有司將治之而詢諸其隣之
老公為䟽其實而薄其罪人皆服公之量公已進封一
品其友之子有官於朝而佚平者過家焚黃數於會而

位公上里人交誼之而公怡然不一毫在意閩陳興祖清尚士也與公厚善客死永嘉公歛葬之盡禮而繪像時展對焉其交篤誼類此性簡澹無他嗜好所畜惟經籍法書名畫及古器物有就鬻者倒囊不靳不嗜酒而喜賓客有過者必傾寫盡歡淮謝病歸日侍甘旨公益樂時携賓客載小舟嬉遊山水之間翛然物表也所作詩文有靜菴集八卷藏於家一日得疾手書數事付淮大要以報君上為重遺命喪葬循朱氏禮而屏斥浮屠

老子法語訖而逝宣德六年十一月五日也享年九十有三訃聞上遣官賜祭命有司治塋廷臣自師傅六卿以下皆致祭配王氏里儒家貞淑秉禮既歸黃氏蚤夜躬勤女事佐裕其家凡所制財用之宜井井有條理尤謹先祀睦族姻而愛其庶出之子孫踰於已出永樂壬寅十一月十三日卒享年八十有六初封宜人後贈夫人其卒也朝廷遣官賜祭命有司營塋子二男一女長男濟庶出次即淮及女皆王夫人出淮洪武中舉進士

由中書舍人累陞右春坊大學士通政使少保戶部尚書武英殿大學士立朝有侃侃之節歷事列聖皆為上所信任今以疾歸第女適王士昌士昌蚤卒無子誓守節不更嫁孫男五樂先卒蔡裴采槃女三葉璣王宜嘉其婿也一未行曾孫男四旭暉珣瑜公與夫人合葬邑大羅山之原於是淮具書以前翰林檢討潘畿所述事狀使來京師求書墓道之石士奇與淮同官三十年辱公知有素不敢辭敬次第書之而系以詩曰

滄海之壘清浙之東奕奕永嘉為文獻邦出者奮庸處
者求志仕止之義代有聞世邦之黃氏其來逾遠當宋
紹興臺幕有衮秉德執義不附權姦卒用裕後而今桓
桓公其世嫡曷潛在下抱貞含和允續乃祖紛其饗誠
公獨引恬紛其矜高公獨履謙五采翹翹翱翔雲漢帝
嘉所生龍光輝煥崇秩重祿玉帶朱衣雍容邱園逍遙
期頤邦有壽俊平世之瑞亦有賢淑德人之配青山鬱
磐雙壁合藏毓祥垂祉百福其昌

贈驃騎將軍左軍都督府都督僉事王公神道碑

銘

宣德十年加贈左軍都督府都督僉事王瑜之祖彥達
考銘皆驃騎將軍左軍都督僉事祖妣黃妣成皆夫人
封其繼母茹太夫人於是瑜求余文勒碑其考之墓用
昭上恩於永遠按王氏初出太原宋諱源者為滄州學
官因家焉其子曰福綿自滄徙泗州娶房氏一子即達
又徙山陽三子銘其仲也字銘甫洪武初從征伐以功

長五十夫暨老而瑜代之瑜謂余曰先考天性質實尚
德務仁蹈履率正而篤於教子恒言忠孝人道之大端
人而昧此不可以立於天地之間瑜不敢違情瑜非承
藉先公之德不有今日幸執事之惠畀之余與瑜同
朝久蓋素知之始瑜既代又選隸趙簡王護衛時留京
師一日其護衛指揮孟賢等十數輩潛結造邪謀篡奪
布置已定簡王實不聞也瑜親戚有與謀者瑜竊聞之
力諫止不聽遂奏發之詔捕賢等悉獲之得其偽詔書

及邪謀本末賢等皆伏誅陞瑜遼海衛正千戶遂進錦
衣衛指揮同知推恩三代贈其祖若考皆懷遠將軍指
揮同知祖妣妣皆淑人封其繼母太淑人後陞瑜都指
揮僉事署左軍都督僉事佩漕運印充左副總兵董江
南餉運其蒞事勤敏持操廉潔秋毫無取於下夙夜顙
顙志在奉國遂實授都督僉事瑜之能子要之本於銘
甫之能父也自瑜效忠十餘年致位二品膺受重寄榮
及祖考天之所以報施厚矣凡人之善患無諸已誠有

之天道未嘗爽其報也銘甫之顯庸雖不在其躬而必
在其子榮命雖不見諸生前而必徵於身後天之道豈
不信哉銘甫四子長琳次琮次瑜次瑄八孫堂堅璽賢
真頓顯賓銘甫生元至正辛丑五月十日沒於永樂壬
寅十二月八日春秋六十有二葬海州城北沙村之原
銘曰

南山之植根本深厚挺發為材凌切雲表宜柱宜梁廟
堂之需宜艦宜舟濟海與湖王氏之宗善仁代有有沿

襲馬厯祖暨考篤鍾於嗣秉志桓桓維忠維誠以事大
君發擯兇慙爰清氛曠帝錫寵嘉曰旌汝義崇秩豐祿
式賁厥躬沂厥祖考申顯褒封厥考維良允蹈於德教
成於家致時赫奕歸焉佳城其藏在此春秋來拜振振
孫子

開國輔運推誠宣力武臣柱國武定侯贈營國公
諡威襄郭公神道碑銘
楊 榮

洪惟太祖高皇帝龍飛淮甸應天順人芟刈羣雄戡定

海內一時智勇材力之臣感會風雲效其忠勤輔成帝
業開千萬載太平之運奇勲偉績鏗鉤振耀勒銘曷彞
垂光竹帛與國家相為無窮猗歟盛哉予嘗叨職國史
竊觀開國勲臣其間能身躋壽考世為貴戚子孫享有
顯爵久而益盛者不數人豈非其存心之仁與積累之
厚有間耶若營國威襄公蓋足徵焉公姓郭氏諱英臨
淮人生有異徵沉毅多智身長七尺膂力過人尤精騎
射年十八從太祖起義兵甚見親信每令直宿帳中取

徐泗滁和采石太平建康鎮常寧國諸郡屢立戰功上
嘗以郭四呼之上親征偽漢陳友諒大戰鄱陽湖相持
連晝夜公時金瘡未瘳力疾鏖戰敗賊於禁江口已而
友諒中流矢死有言公之功者上問之公曰天威神筭
臣何力焉上益重之時友諒子理復立於武昌進軍攻
之其將陳僉同者驍捷善禦馳入中軍帳下上方坐胡
牀遽呼公曰郭四為吾殺賊公持鎗躍馬奮臂一呼賊應
手殞墜上解所御赤戰袍衣之曰唐之尉遲敬德不汝

過也授驍騎衛管馬軍千戶從征襄陽克淮安鳳陽安
豐陞宣武將軍驍騎左衛指揮僉事洪武元年戊申從
大將軍徐公北定中原下齊魯克汴梁平河南取元都
破潼關彰德廣平所至有功初大將軍遣公取通州公
距城三十里為營深溝高壘為持久計衆請速攻之公
曰吾師遠來敵以逸待勞攻城非我利也宜出其不意
破之翌日大霧公以千人伏道傍率精騎三千直抵城
下元將諤斯巴國公帥敢死士萬餘張兩掖而出與戰

良久公佯敗彼乘勝來追伏兵中起截其軍為兩道斬首數千級擒元宗室博囉梁王遂克通州元君乃北遁克永平真定定州生擒守將湯同僉復從平章常公取太原守將王保保軍於城西公憑高望之謂常公曰彼兵多而不整營大而無備請夜劫之常公深然其計遣五十騎伏城東十里以舉火鳴砲為期至夜公率十餘騎潛入其營舉火鳴砲伏兵亦舉火鳴砲常公引兵繼至鼓譟之聲相接保保軍大潰自相屠戮乃棄城遁下

興州大同至沙淨州生擒偽將竹平章渡河取鹿臺西
安鳳翔鞏昌追敗賊將賀宗哲於亂山庚戌陞本衛指
揮副使從征迤西克定西討西夏察罕扎爾撫安呼遜
平章沙淨州復叛討平之克登寧州斬首二千級獲牛
馬數千陞昭勇將軍本衛指揮使賜金龍衣一襲辛亥
陞驃騎將軍河南都指揮使將赴鎮皇寧妃公之女弟
也上遣至公第餞之且謂公素清儉賜白金三十罌廩
馬二十二匹時河洛新罹兵燹邑井蕭條居民艱食盜

賊充斥公宣布威德綏輯流亡申寬條明賞罰遠邇來歸者日以千計未期年戶口倍增境內大治丙辰移鎮北平河南士女不忍其去遮公馬數十里不得行甚至泣下既去為立生祠北平初定邊方反側不寧公開示誠款諭以理亂禍福人心遂安元左丞何允中等聞公之德來降者凡九千餘人上遣使勞以上尊羊馬授龍虎將軍北平都指揮使賜誥命逾四年召還京進大都督府僉事更定官制改前軍都督府僉事灰山賊反承

命討平之賜馬七匹辛酉從潁川侯傅公征雲南既至
命公及都督陳桓胡海分道進討道多險隘諸將欲深
入公曰破敵貴先聲攻取必自近始舍近趨遠豈策之
上耶遂先攻赤水河路距河二十里為營時久雨河水
瀑漲公曰賊恃水漲不意吾濟下令諸軍斫木造筏夜
半濟河比曉賊始覺遂大潰生擒烏撒并阿蒙諸蠻由是
雲南諸賊破膽進攻曲靖六梁州闔索嶺及偽石元帥
山寨皆克之至江川椅子寨寨依山公先遣騎兵五千

攻其前賊空寨迎戰復以精騎數百擣其後斬門而入
火砲連發烈焰張天賊乃亂悉破滅之進攻大理金齒
降其偽官段平章攻安寧州賊將布哈特穆爾棄城走
破富民縣山寨攻靖守州蠻七寨一日夜破之攻牢撞
山寨取仁德府破哨店山寨圍姚安敗賊將李自久平
蒙化州鄧川州破三營復光寨過金沙江攻北勝府生
擒賊將高生平麗江府平津等州前後斬首一萬三千
餘級生擒二千餘人收精兵人馬數萬船千餘艘蠻民

降者數十萬戶雲南諸路平論公功進爵開國輔運推
誠宣力武臣柱國武定侯賜誥券食祿二千五百石子
孫世世承襲乙丑加靖海將軍鎮守遼東丁卯同大將
軍宋國公馮公討北邊納克楚降之師旋敵將追襲之
公與戰創傷左脇箭復中右脇公佯呼敵傷吾甲我衆
益奮連戰數十合敵遂却已而進征北右副將軍仍鎮
遼東戊辰出討北庭至捕魚兒海邏騎偵敵營不遠公
乃令諸軍少憩飲馬銜枚卷甲倍道而馳直抵其營敵

王覺乃率十餘騎潰圍出其將曼濟太尉來拒我師公
手刃之獲兩營所積金寶珍玩圖書降其衆五萬餘人
生擒其將約約司徒納木囊嘉卜太尉繖固達勒袞布
達拉王子等四萬餘人馬駝萬五千匹牛羊輜重無算
帥還賜白金千兩鈔八百錠綵幣四十匹已已上以天
下無事且憫諸將老欲保全之厚加賜賚遣歸其鄉公
亦就遣庚午獨召還京上賜坐與語歡甚命統禁兵及
在京諸軍蓋上春秋高知公忠謹特倚重焉辛未以北

兵阿拉克實哩侵邊命公討之獲其人口孳畜逐北至
鴉寒山而還丁丑川陝寇發勢張甚上顧曰非卿無能
勝其任者授征西將軍印討之至沔之後河生擒賊首
高福興及黨四千餘人公疏其同謀者請誅之脅從者
乞勿治且言有司不恤民宜正其罪上可之永樂元年
癸未二月十七日卒於家享年六十有九計聞太宗文
皇帝為之震悼輟朝二日遣官致祭賻卹有加贈營國
公諡威襄賜塋京師聚寶山之原公孝友仁恕恭儉誠

實出於天性母夫人嘗疾篤懸身燈告天求以身代疾
遂愈人皆謂公孝感所致後母夫人卒公廬墓側晝夜
號泣不絕聲卧寢於地毀瘠日甚一夕夢母夫人告曰
地濕則致疾致疾則傷生汝固純孝惟竭忠報國為父
母光墓不必廬也公感悟而歸家三年之中哀痛如一
日平居兄弟怡怡克盡友愛御軍行師動有紀律推心
任人甘苦同之其攻克州郡必禁虜掠戒殺降封府庫
收簿籍一錢尺帛不敢私嘗北征軍法夜必令親軍更

直荷戈環帳立一夕風雪大作公悉罷遣歸營其愛恤
軍士多類此家居簡靜好讀書天文地理百家之說靡
不通曉教訓子孫以儉素力學為務事太祖高皇帝四
十餘年小心謹慎未嘗有過眷遇雖隆而自處益謙上
嘗御便殿賜坐適有奏事者公趨避之上曰卿第坐朕
自理事不汝闕也其見愛敬如此時公卿多置田產公
多不治上問之對曰臣一布衣荷陛下寵靈叨有封爵
子孫衣食餘饒安敢增益俾多侈心上善之嗟歎良久

公大小百餘戰金瘡遍體每陰雨痛甚及聞征討之命
即日就道未始以老疾辭其事上竭忠蓋如此曾祖參
祖聚父山甫累贈營國公曾祖妣何氏祖妣趙氏母單
氏贈營國夫人配馬氏封營國夫人公兄弟四人長早
卒次興以軍功封鞏昌侯贈陝國公諡宣武次某福建
都指揮使次即公也子男十二人鎮銘鏞鑑銓錡鈺
鈇鑕銅鎗鎮駙馬都尉尚永嘉公主銘遼王府典寶追
封武定侯鏞中軍都督府右都督鑑中都留守司副留

守鑰散騎舍人錡早卒鉦贈承德郎尚寶司丞鈐旗手
衛指揮使女九人長適府軍衛指揮僉事蘭瑜次適濟
寧衛指揮使弋某次遼王妃次適府軍衛指揮僉事趙
斌次郢王妃次適金吾右衛指揮同知范聚餘早卒孫
男二十有八琮琰璧瑋瑄瑾珣瑤瑠瑢玘瑤璫璟玘瑋瓊璉璣璵
琬琰餘尚幼琮府軍衛指揮僉事琰襲武定侯瑾早卒
珣尚寶司丞瑤梁王府典寶璫璟皆勲衛孫女十六人
長仁宗昭皇帝貴妃次適留守左衛指揮陳鑑餘在室

曾孫男五人聰耽餘尚幼聰散騎舍人予觀前史稱郭汾陽功蓋天下而主不疑位極人臣而衆不嫉富貴壽考始終令節七子八婿諸孫數十人俱膺顯仕唐世榮之若公勲業之隆子孫之盛方之汾陽夫豈多讓皆由公存心一本於仁故積累之厚愈遠愈隆焉嗚呼偉哉珎以神道之石未立無以昭示永久來請文予閱其家傳考定其大者次第之而系之銘曰

天啟皇明淮甸龍飛乘時應運風雲一機太祖受命汎

掃餘孽羣力桓桓鼓勇就列東征西伐北南以平斷出
神聖功協衆能展也郭公有文有武翊輔真主實天畀
付鄱陽之戰衆論偉公公仰廟畧不有其功既捷通州
再捷太原河南北平黎庶懷恩南詔之征武功尤大誅
叛全生蜀民是賴維彼烽烟來自漠北卷甲擒之兵氛
蕩滌皇有嘉錫錫爵褒功金書鐵券武定啟封錦袍御
馬白金文綺赫赫高門煌煌戟棨世聯國戚代有顯融
匪幸所致惟公之忠忠在朝廷載之信史亦有孝思永

錫爾類在昔汾陽著勲有唐公實似之于今益彰我作
銘詩勒功墓道百世斯承有赫其耀

太子太師郭公神道碑

天眷國家誕啟中興之運必有英傑為之股肱運謀効
力於其間而後勲業克成故榮祿大夫太子太師郭公
實其人也公諱資字存性姓郭氏河南武安人曾祖諱
溫父仲禮皆以公貴贈榮祿大夫太子太師曾祖妣淨
氏贈夫人祖妣馮氏妣王氏皆加贈一品夫人公生而

穎敏志氣超羣兒弱冠入邑庠從師受春秋有所造就
洪武辛酉入太學甲子領應天府鄉薦明年會試禮部
對策大廷賜同進士出身初為戶科庶吉士擢戶部總
部試主事丁外艱服闋實授本部湖廣清吏司主事改
陝西清吏司吏不容奸聲譽頓起陞都察院左僉都御
史無何尚書郁新以才薦之授前北平布政使司左叅
議蒞事之初即以本司弊政為言太祖皇帝嘉其忠直
陞本司右叅政公悉心殫慮贊佐有方不數月陞左布

政使精勤詳慎紀綱大振豪猾歛跡良善獲安時太宗
皇帝在藩邸尤愛重之公有所言無不聽納及起義靖
難命公城守撫輯兵民供給糧餉百費所需未嘗乏誤
嘗以漢蕭何擬之太宗皇帝即位論功召陞戶部尚書
賜白金文綺楮幣視諸伯未閱月以北平重地奉命乘
傳掌布政司事未幾詔建北平設行部拜公行部尚書
公以北地軍民初安生業始遂而官司所費冗濫當搏
節以恤下乃惓惓以祛弊舉廢為務或有不悅而謗公

者太宗聞之降勅慰諭益以心腹任之滿考賜宴內廷
頒勅獎諭錫以誥命贈公祖若考皆資政大夫北京行
部尚書祖母及母皆夫人歲辛丑太宗皇帝都北京革
行部調公戶部職務叢脞公勤以率下事有條序仁宗
皇帝嗣位念公舊德以尚書兼太子賓客已而復念公
抱疾艱於步履不忍煩以政事特陞太子太師俾致事
歸鄉既加賜資又令戶部給公半俸蠲其稅糧差徭特
賜璽書慰勞甚至公歸杜門教子孫讀書屏絕外累皇

上嗣登大寶眷求老成念公祇事列聖勞績居多詔起復掌戶部事免其趨朝特賜鈔二萬貫公愈感激効忠雖祁寒盛暑必坐公署視事不暫廢僚屬胥吏莫不敬憚焉滿考賜宴於禮部獎以勅書譬公如歲寒松柏愈老愈勁其優待隆厚至於如此宣德癸丑十一月疾劇屢言蒙被朝廷重任無以效報為愧切切訓諸子及孫當感恩思報不及家事十二月癸丑卒上深悼惜為公罷朝遣禮部尚書胡濙賜祭勅工部製棺營喪塋贈特

進光祿大夫柱國湯陰伯諡忠襄官其子佑為戶部廣
東清吏司主事公生元至正辛丑十一月己巳享年七
十有三卒之日家無餘貲公卿大夫皆往哭弔致奠祭
配陳氏賢而勤儉累封一品夫人子男五長儀先卒次
即佑又其次曰儼曰倫曰俊女二季榮高讓其壻也孫
男十七人孫女十二人惟公廉介勤慎剛果有為自始
仕至老視國事如家事凡所施為毅然自任不畏強禦
雖怨有弗避害有弗辭與人辨論嚴厲之氣見於詞色

而推之於政畧無害人蠹物之心誠國家忠謹直亮輔弼之臣也佑奉樞歸以某年某月某甲塋某山之原乃以卽中黃璿所狀事行來請文勒之墓道以垂永久余與公交好三十餘年不可以辭既序其概而復系以詩曰

川嶽降靈篤生賢哲乘時奮庸以樹勲烈惟公之生早負俊才列職卽署超僉憲臺風猷宏振綱紀斯秩出叅大藩政興弊息凡所設施算無遺策顯命薦臨特拜方

伯赫赫太宗仗義而興命公居守撫民餉兵既正大位
嘉公勞績進位尚書厚其賚錫公愈飭勵經國如家謗
怨弗恤恩寵屢加仁宗嗣位眷顧尤重兼秩宮僚式隆
任用念公抱疾進位師臣俾休於家疊施以恩皇上繼
統眷公耆舊詔復任事寵待加厚維公忠貞衆所共知
維公勲業顯著於時筋力雖衰寸心尤赤奄忽長逝帝
用悼惜贈爵賜諡喪塋是營官其後嗣存沒光榮維茲
光榮從古罕致公具有之其誰克似武平有山鬱鬱其

崇勒文墓道垂耀無窮

故光祿大夫柱國少師兵部尚書兼華蓋殿大學士贈特進光祿大夫左柱國太師諡文貞楊公神

道碑

楊溥

正統九年三月甲子光祿大夫柱國少師兵部尚書兼華蓋殿大學士楊公卒公在疾時自為墓誌及卒其子槀秣號泣請余為神道碑文神道有碑古制也墓有銘古道也義不可辭乃序而銘之公西昌儒宦家子諱遇字

士奇別號東里曾祖景行元翰林待制祖公榮考子將
累贈以公官曾祖妣祖妣妣皆夫人公一歲喪父鞠成
於母夫人陳氏自幼端重異羣兒受業於鄉儒海桑先
生海桑母夫人世父也見其敦敏甚器重之公自知學
手不釋卷十二三通舉子業鄉人請為子弟師嘗有儒
生過館下棲棲然携書數冊公詢之聞其母老無所養
乃分其徒之半與之俾得束修奉母姑氏舉家瘟疫門
無人跡公夜宿其家浹旬為之調治全愈始還於是寢

有聞於鄉里母夫人嘗曰吾兒力學嚮義足以光先世
及弱冠出游章貢章貢守儒者嘉重之俾攝琴江教事
琴江令亦儒者深賢之公感知已勸令尚平恕嘗為之
言脫誣枉重罪數人或持金謝公者公若不與聞斥之
出遊江湘所至人敬慕欲薦之輒辭不就遂有聲江湖
會朝臣以名儒薦徵入翰林編纂一時儒者稱公博洽
試於吏部考其文為首遂有聲於朝授王府審理副復
召入翰林編纂太宗皇帝入正大統改授編修屢遷翰

林學士改左春坊大學士洪熙初陞禮部右侍郎華蓋
殿大學士踰月陞少保兵部尚書尋陞少傅階榮祿大
夫正統初少師階光祿大夫公厯事列聖四十餘年信
任始終淳臻極品夫豈偶然哉太宗皇帝初臨御修復
成憲撫綏夷夏神謀聖斷洞合事幾時在翰林與密勿
以敏捷幾智承眷顧者亦有其人公獨持重勤事未嘗
以賢智先人嘗受命與廷臣議事公審衆長以聞上稱
公能服善及車駕巡北京命皇太子監國乃命公輔導

時營建北京征勦叛逆匠作軍興徵於南方者咸啟白
皇太子公言監國之體以尊君順親為心皇太子嘉納
之凡所奏對及裁處庶事鮮有過舉仁廟即位公以宮
僚薦膺重任知無不言言無不納曾不踰年裕民之政
舉行無遺嘗賜勅褒重之賜象牙圖書曰貞一以表其
心賜銀章一曰繩愆糾繆俾匡所失賜畿內田四千畝
固辭請業貧民詔三俸俱支公懇辭尚書俸宣廟臨御
益見禮重及東藩構亂公隨駕東征罪人既得公請絕

浮言以全親親開釋脅從以廣仁恩上嘉納之今上嗣位公以老成弼亮治化啟沃聖學力所可為者身任之恒恐不及常以年高辭弗許上憫其情命還鄉展墓公以三孤之重還鄉里謙抑自處如昔在鄉里時甫數旬即來京又六年遺疾上命明醫療之久不愈賜璽書寬慰及賜寶鈔光祿酒饌以資養之竟不起時年八十上深惜之輟視朝一日遣禮部尚書胡公諭祭贈特進光祿大夫左柱國太師諡文貞仍命有司給舟車歸其喪

塋鄉邑白雲原是年某月日也公存心忠厚急於為善
自布衣時篤念族屬周恤急難審取舍行義卓卓為人
稱道及為大臣識達大體嘗曰大臣以薦賢為本然全
才難得故所薦引取其所長不求其備公壽考康寧恩
榮始終宜也非幸也娶嚴氏累贈夫人繼郭氏累封夫
人側室李氏子三稷稹秣女四人梁楫蕭承恕劉鈞蔣
重其壻也孫男六昱晟暉昉晏昕女三人朝廷修三朝
實錄公為總裁筆削有公論平生所著有沙羨稿石臺

稿文籍志法書志東里集總若干卷藏於家公立心制
行有自撰墓誌有東里傳有小傳溥自出仕與公交游
在館閣議事彼此不能無可否退而歡如也存亡之感
曷有窮已茲用撮其概書之神道為之銘曰

斯文遭際千載亨期以翼君德以福羣黎越稽徃古異
世同規皇明啟運大統重熙純佑有命挺生瓌奇左右
密勿四紀于茲玉成耆德以臣以師中流砥柱羣疑策
龜天不慙遺吁其孔悲

明文衡卷七十七

欽定四庫全書

明文衡卷七十八

明程敏政編

神道碑

兵部尚書贈榮祿大夫少保兼尚書廊公神道碑

王直

兵部尚書廊公既卒之明年皇帝悼念不已詔特贈少保兼兵部尚書進階榮祿大夫而官其子儀為主事儀

奉公衣冠以歸將以某年某月某日葬於某里之原而述公之行請文以刻諸墓道嗚呼公故人也其可辭公諱堃字孟質別號樸齋郴之宜章人曾祖某祖某皆有學行而不仕父子輔為學官縣令名重當時及公貴祖父皆贈兵部左侍郎妣李氏王氏皆贈淑人公早喪母祖母李撫育之見其不凡最鍾愛曰是子能大吾門公孝友勤儉出於天性而撫弟妹尤篤其於學問不待程勸選為邑庠生而泰和王敬先為訓導循循善教公亦

勉勉善學學成取進士遂入都察院理刑獄以廉平得名永樂癸巳拜監察御史時車駕在北京有言南京鈔法阻滯命公往察之衆謂將起大獄公往擒市豪一二以歸奏曰市人聞令皆震懼今鈔法已通矣上領之而罷倭寇犯遼東公往按問戍守之失律者凡百餘人皆應死公為開陳其可矜狀甚明上然而宥之山海關吏卒邀阻行人以取財亡逃之人則受賕縱之去弊積滋甚公廉得之歸至闕悉擒治抵罪弊為之省丙申北京營

造執役之人累鉅萬上念有病者命醫與善藥又慮其奉行不謹命公察視之公躬履其地令潔其穢汚而時其藥食由是病者多不死戊戌石州人有詣闕告變者曰州民與陝人羣聚千餘謀不軌上擢公為陝西按察副使往理其事果實即以官軍勦戮毋貽民患賜之楮幣給驛而遣之公至察其誣乃反獄亡命妄言冀脫死即具以聞上命止弗問而誅其造誣者宣德己酉陝右饑華亭宜川尤甚公私廩皆竭公巡歷其地憂之乃移

旁縣粟賑焉羸病不能興者命官府煮粥食之民以全
活庚戌至納潁憂歸道聞父喪哀愈甚每號痛輒欲絕
其治喪一用古禮其祭亦如之服除拜應天尹輦轂之
下賦急役繁公一以養民為務事無大小苟可以興利
去害無不用其心至於市征田稅皆酌其平豪猾不得為
輕重賓興之歲公設科取士厚其禮而峻其防得人為
多且撙節其費以待會試故事集而民不擾視異時蓋
省十三四歲大熟麥有兩岐者民歸德於公公拒弗受

正統改元進拜兵部左侍郎時西鄙有警尚書王公徃視師公獨任其事上嘉其才荆湘民多隸戎伍公家亦與焉至是特除其籍以示寵己未京師淫雨壞官民廬舍公奏曰此陰氣為沴兵陰也皆臣等不職所致乞罷歸田里上慰勉之師征麓川公舉蔣貴可任卒有功衆人以為知人天下軍衛總小旗當代者於例必就試京師有道遠無資不能來者終身不得代公請各於都司試之人以為便時有言欲變易軍伍使南北之人各適

其土性下羣議衆依違其間公曰此舊制不可紊稍有變易將不勝其弊咎將誰歸卒不動嘗自念曰治軍吾職也當為國家惜其力養其銳氣以備不虞故凡軍家利病有當興革者必為上言之多見信從己已邊報敵入侵上命治軍旅而權姦獨主親征不與外廷議及詔下大臣皆以為不可即上章請留不聽公從行出關屢奏言此邊事不宜屈至尊惟指麾諸將足以成功不聽權姦惡其數言事欲疎之勅公與戶部尚書王佐隨老

營至懷安陞馬幾殆從者請少留懷安就醫藥公曰天子在前吾為大臣豈可託疾求自便力疾而往至雲中車駕回鑾然行止疾徐惟權姦所命至宣府北兵踵至公深以為憂再上章請疾驅入闕而嚴兵為殿皆不報最後公詣行殿申前請權姦怒曰汝腐儒安知兵事再妄言必死公抗言曰我為社稷生靈而言何得以死懼我權姦愈怒叱左右扶出公與王公相對泣帳中明日次土木營中無水士馬皆饑渴敵四面集矢下如雨衆

奮欲戰又為權姦所沮須臾師覆公遇害蓋八月十五日也生於洪武乙丑某月某日年六十五娶吳氏有賢行子男一即儀女一嫁同里士人歐陽瑄孫男三琦琳珍公學博行莊仕宦四十年風裁凜然見重於士大夫威行惠施近悅遠懷服仁蹈義至老不衰此其生平大節也權姦誤國而卒陷焉豈獨公之不幸哉嗚呼銘曰允毅鄺公逢時之隆學古入官薦躋顯庸執法在朝為名御史再陞外臺其行愈偉京尹堂堂百郡所瞻惟少

司馬戎律有嚴遂陟夏卿君子所重噫其逝矣云誰不
慟人道之大曰義與仁仁義不違何愧於天刻文墓碑
負以龜趾永永不亡庶其在此

禮部右侍郎謚文肅錢公神道碑

公諱幹字習禮吳越武肅王鏐之後初吳越歸宋子孫
皆顯仕其為吉州防禦使曰惟濟子昕遂家廬陵三傳
至貴和徙吉水諸源為望族曾祖以吉祖立志父好德
母赤岸陳氏皆以德義重鄉里公生而喜學父母兄弟

皆鍾愛凡所師友者見其文敏而思深且多出腹藁莫
不奇其才從學南昌訓導顏子明而卒業於翰林修撰
張伯穎永樂六年江西鄉試第一明年會試中第十時
車駕幸北京廷試不果由是從容京師間縱觀聖朝政
化之美聲明文物之盛四方萬國謳歌朝覲之會同而
才益進九年廷試取進士入翰林為庶吉士尋陞檢討
叅史職甲辰會試命公為同考八月仁宗皇帝即位一
新庶政陞翰林侍讀與知制誥洪熙元年賜勅褒贈父

母及封其妻勅同修太宗皇帝實錄仁宗皇帝升遐宣
宗皇帝正大位勅修仁宗實錄公亦與焉時有詔許焚
黃公承命以往丙午促召還京偕太子少保金幼孜等
入見命完修實錄三年春闈則命公為同考官三年戊
申元夕賜文武近臣觀燈萬歲山賜宴公及文臣賦詩
以進賜之鈔四年八月應天府鄉試奏請考官命公為
之十二月朔是日霜寒甚上命光祿賜在廷文武羊酒
以禦寒曰皇祖考在位每旦常有賜今朕多事忘之汝

勿忘五年兩朝實錄成賜金織襲衣銀幣考禮部會試
陞翰林侍讀學士蒙給誥命贈父以已官母與妻皆贈
宜人痛寵命之不生及也哭之過哀七年駕過史館有
作併賦招隱之歌以示近臣蓋是時天氣清明聖心悅
豫懷賢覽古悠然天趣之高發見於吟詠於此蓋可見
也八月考北京鄉試十年乙卯春宣宗皇帝晏駕今皇
帝即位二月上宣宗尊號賜白金秋九月詔修宣宗實
錄十二月賜文綺丙辰正月改元正統大臣建議開經

廷詔可其奏公與為講官三月上臨軒策士公讀卷勞以羊酒賜宴於禮部戊午四月進宣宗實錄上御奉天門慰勞甚至賜白金文綺織金衣襲陞翰林學士賜宴於禮部八月應天府鄉試命公為考試官四年充廷試讀卷官六年考北京鄉試七年壬戌為行婚禮賜紗衣紗帽金相香帶等物九年甲子三月大新國學成上祇謁先聖躬行釋奠禮幸彛倫堂命祭酒司業以書易進講從臣坐聽公與其列七月公上章乞致仕弗允且降

勅諭天下憲臣及縣令有難其任察舉以聞公舉所知
而人以為當十年乙丑禮部春試上復命為考官三月
進五倫書蒙賞賚冬十月欽陞禮部右侍郎公以老病
懇辭弗獲諭使就職朝廷稽古右文事多由禮部公夙
夜祗慄惟恐有弗稱上又命兼署吏部公益謹畏不自
寧求去益切詔許之公卿大夫餞送出都門皆有詩公
獨取歸去來辭長歌以自快人莫不以為榮而喜聖德
之厚也公孝友忠信篤於倫誼厚生送死君子稱之至

姻戚故舊亦無悖於理者在位三十餘年以文章議論
為士類所敬樂於教人學者亦樂從之遊典文衡者八
讀卷者二佳時暇日擇勝往遊長篇短章發於歌咏以
揚太平之盛美及老而歸順老之堂子孫侍教者十五
年凡所著述論思聯為大卷有應制集詞垣藁詞垣續
藁歸田藁藏於家後世傳焉天順四年九月嬰疾五年
四月益甚五月二十二日終於正寢春秋八十有九訃
聞上為之嗟悼命禮部賜祭工部為治祠墳謚曰文肅

配王氏繼娶曾氏皆有賢行子二長鸞停先卒次鳳躍
習舉子業女一人孫男某曾孫男某初公之歸即欲為
安樂窩得地於其里洲背山而營焉至是鳳躍以其親
戚高僉憲所述行狀請於予曰先考文行公知之且交
最久神道之碑非公孰宜為予老且病不得辭乃勉副
其意詩曰

洲背之山有崔者墳是誰所營武肅令孫惟此令孫克
勤帝載由唐而興日廣且大歸于有宋以德以仁衣冠

相傳有土有民天祚忠孝賢者相繼維時能來繫公是
視公之遊此旌旆于于山靈來瞻風卷雲舒植木有本
驪水有源公之本源人其式旃公每來歸子孫翼翼誦
詩讀書有永無斁惟公世家海內所聞政事文章亦煥
其羣我與為友式篤于義九十而終尚利後嗣公官三
品神道有碑我作銘詩百世之詒

奉天靖難推誠宣力武臣特進榮祿大夫柱國太
保寧陽侯追封濬國公諡武靖陳公神道碑銘

李賢

永樂初靖難功臣不下數十人然克享祿位於悠久者
鮮矣惟太保寧陽侯陳公厯事五朝出藩入衛凡六十
餘年而以令終嗚呼盛哉公諱懋字舜卿鳳陽壽州人
高祖萬曾祖福三祖闕俱追封涇國公妣皆涇國夫人
父亨從太祖高皇帝定天下以功陞都指揮使洪武三
十二年從太宗文皇帝靖內難復以功進都督同知卒
贈奉天靖難推誠宣力武臣特進榮祿大夫柱國追封

涇國公諡襄敏母韓氏涇國夫人襄敏公三子長恭嗣
為都督同知次忠府軍前衛指揮使李即公也器宇宏
遠識見超卓尤負膽氣工騎射年弱冠即從父領兵為
前行凡壩上廣昌蔚州大同白溝濟南之戰與父同功
又禦敵於單橋藁城西寨東平固鎮小河戰尤力累陞
右都督永樂初論功行賞進封奉天翊衛宣力武臣特
進榮祿大夫柱國寧陽伯食祿一千石子孫世襲賜誥
券賚予甚厚六年受詔佩征西將軍印總兵鎮守寧夏

賜寶鉏白犂牛羊以為戒嚴之費公至鎮號令一新凡
邊人降附者親撫綏之務得其歡心乃己七年選精兵
自將大敗敵於境外由是殘兵遠遁邊塵為之一清捷
聞加封奉天靖難推誠宣力武臣特進榮祿大夫柱國
寧陽侯食祿一千三百石子孫世襲復賜誥券及貂蟬
冠服錦綺寶鉏八年春上親征北庭公將左掖兵十一
年冬還鎮十二年春上復親征公仍將左軍俘馘甚衆
明年還鎮十四年夏有報敵人瑪哈穆特死者公未之

信曰是欲懈我邊備也即申飭諸將固守已而敵衆果來見有備而退二十年春上復北征公率所部兵以從還京賜玉帶金綺龍衣且聞公有女賢淑禮聘入宮冊封麗妃尋命歸寧父母賚予駢蕃當世無與爲比二十一年詔公統陝西寧夏甘肅三鎮兵出勦叛逆公率衆直抵賀蘭山擣其要害盡收其君長額森托噶部落及其牛馬駝羊數萬凱還上大悅寵賚有加二十二年復隨上北征師還以公爲殿至京遂領前軍都督府事仁

宗皇帝登極以公勲戚有勞加太保復官其長子昭為
勲衛宣宗皇帝臨御待公尤厚樂安州之平公領京營
兵衛上有功還有金帛人口之賜二年復鎮寧夏三年
春奏徙靈州城以便防守四年春得玄白二兔以進上
賜璽書獎諭兼有玉帶龍衣馬圖之賚六年還京十年
命佩平羗將軍印移鎮甘肅正統改元今上皇帝嗣位
念公勲戚之舊召還奉朝請十三年冬福建民鄧茂七
作亂偽稱閩王勢甚猖獗上曰此賊非老将不能平特

命公率師往討之至浙江有欲分兵先守海口者公曰
如此是絕其生路則為死寇矣不從明年春師次建寧
有欲屠沙尤二縣者公曰如此則益堅賊心矣乃下令
諭之俾各復業能斬賊首者官賞與王師同於是降者
日衆公曰賊勢已孤無能為也乃五路進兵一鼓而收
之凱還賞勞加等命領中軍都督府事尋兼領宗人府
事景泰中加太子太師天順改元皇帝復位恩遇益隆
固辭宮師許之六年春忽得疾踰秋不能起上言臣老

死不足憾惟陛下以生民為念任賢用能以圖太平之
治則國家幸甚上覽之惻然曰看卿所奏足見忠誠宜
尚加調治以副朕懷久之醫藥弗効遂薨時天順癸未
七月十六日也距生洪武己未二月九日享年八十有
五訃聞上震悼輟視朝一日追封濟國公諡曰武靖遣
官諭祭加賻及營葬事東宮及諸王亦各致祭公偉觀
修髯語音洪亮曾懷磊落敬禮文士雖位極人臣未嘗
妄自尊大而南征北伐口不言功當為中興名將稱首

配嚴氏封寧陽侯夫人早卒子男六人長即昭次曰福
寧俱早卒次曰晟為勲衛次曰潤次曰瑛次曰昂女五
人長適應城伯孫傑次即恭順榮穆麗妃次適東勝右
衛指揮使張昭次適府軍左衛指揮使張輪次適都督
同知馬良潤等卜以是歲某月某日與嚴夫人合葬於
都城西香山之原銘曰

壽有陳宗父子傑特涇公濬公後先開國文皇靖難孰
多勲勞涇公輔之首秉節旄奮武桓桓所向披靡大事

垂成星殞於壘濟公承之以篤世忠鼓勇前馳逕公是
同躍馬揮戈到處蹀血乃伯乃侯成此茂烈金符虎節
屢鎮邊陲于征于狩無遠不隨閔寇勛勩東南恐震濟
公征之遂輯其衆巍巍勲戚歷事五朝龍衣玉帶惟帝
之褒壽嘏既純允顯六紀容與承平宿將無幾煌煌愍
冊賁此令終生死哀榮孰如濟公西山嵯峨佳城在側
史臣勒銘千載輝赫

恭順侯追封涼國公諡忠壯吳公神道碑銘

天順卒已逆賊曹欽謀為不軌潛俟七月二日早朝入
內為亂恭順侯吳公先於是夜一鼓聞之即與其弟廣
義伯琮約總兵懷寧伯孫鏜走詣長安門告變於是禁
門不啟賊計遂窮舉火燒禁門公等率兵勦殺奮不顧
身賊雖誅滅公已捐軀矣嗚呼先機告變公之忠也殺
賊喪元公之勇也然則逆賊之敗豈非公之功乎皇上
聞公之歿哀悼殊深輟視朝一日追封涼國公諡忠壯
凡秘器諭祭賻儀之類悉從厚典復命有司為營塚壙

以安葬之蓋痛念勲戚之臣為社稷而死故報功之典
倍徙尋常也既而琮詣予泣且告曰先兄不幸歿於鋒
鏑茲欲立石墓前以白於世非先生之文不可辭弗獲
按通政司參議趙君昂之狀公諱瑾字廷璋其先西涼
人祖諱允誠永樂中累以戰功封恭順侯正統甲子以征討
伯爵洪熙初以戚里恩進封恭順侯正統甲子以征討
功加太子太保己巳秋禦敵北邊力戰而死追封邠國
公諡壯勇母楊氏封邠國夫人叔父克勤官至左軍都

督府左都督亦同兄歿於陣追封遵化伯諡僖敏公生而英銳襟度爽闊親賢好善未嘗以門第驕人以故搢紳士大夫樂與之游相與議論古今講說道義而公頗能識其旨趣尤閑武藝精騎射方其父叔禦敵之際公亦在陣中發矢射敵洎父叔矢盡而亡公始就執其酋長念公忠義之後釋之乃還京遂嗣父爵天順改元皇上復位公以勲戚隨侍應對稱旨自是日備顧問賚予甚厚尋命理左軍都督府事公益感激夙夜效勤一旦

遭變委身則其允蹈忠義視乃父乃叔為無愧矣公生於永樂癸巳十二月一日享年四十有九配李氏故會寧伯之女有淑行封侯夫人生子男二長曰鑑次曰鏞次曰錫女一適指揮使劉玉琮嗣廣義伯遵化公之子卜以是年八月某日葬公於順天府房山縣之新莊從先兆也銘曰

世祿之家忠義無幾有若吳門展也無比彼美忠壯虎視眈眈遵化之姪邠公之男忠以捐軀壯以禦侮相繼

如歸光照中土飾終追榮惟帝之恩匪帝之私惟以報
勲閔矣泉宮西山之麓秘器旅陳穹碑載陸仁者有後
公則成仁銘以貞之何千萬春

禮部尚書致仕贈太保諡忠安胡公神道碑銘

我朝名公鉅卿聰明特達者多矣若器識宏遠福壽隆
長惟武進胡公一人嗚呼休哉公諱濙字源潔別號潔
菴其先淮安宿遷人有諱藩者仕劉宋為太子左衛將
軍遷豫章數傳至諱咸者仕唐為侍御史子常州刺史

瓊生持因家於常遂為武進人持四世孫曰宿仕宋為
樞密副使宿十一世孫曰中立為常州制置中立生昭
公之高祖也曾祖庸仕元為江浙儒學提舉祖禎為常
州路醫學錄考宗仁隱居不仕皆以公貴贈光祿大夫
少傅兼太子太師禮部尚書曾祖妣章氏祖妣徐氏妣
李氏皆贈一品夫人公生而髮白彌月方黑母夢一僧
持花以遺之覺而生公居數日有僧至家索觀公見僧
即笑僧曰此吾師天池高僧後身也命我求見以笑為

誌果然聞者咸驚異之公自幼端重不好嬉戲弱冠入
邑庠洪武中領鄉薦登庚辰進士第授兵科給事中尋
遷右給事中公勤識大體士林譽之太宗文皇帝入正
大統公供職如舊永樂改元秋以奏對稱旨陞戶科都
給事中丁亥上察近侍中惟公忠實可託遂命公巡遊
天下以訪異人為名實察人心向背時御製性理大全
為善陰陽孝順事實書成俾公以此勸勵天下以故雖
窮鄉下邑軌跡無不到在湖廣間最久丙申秋還朝丁

內艱乞終制不允尋進禮部左侍郎明年往巡江浙諸
州授嘉議大夫癸卯復自均襄還朝時車駕親征北方
駐蹕宣府公馳謁行在所上臥不出聞公至喜而起且
慰勞之曰卿驅馳良苦賜坐與語凡所歷山川道里郡
邑豐嗇民情休戚以至所聞所見保國安民之事悉為
陳說上欣然納之向所疑慮者至是皆釋比退漏下四
鼓先是仁宗皇帝為太子監國時有飛語上聞文廟屬
公往察之公至以所見七事皆誠敬孝謹密疏以聞上

覽之大悅自是不復疑仁宗嗣位特賜誥命授正議大夫資治尹已而聞公曾有密疏疑之乃轉太子賓客兼國子祭酒之官南京未幾閱章奏見公所上密疏深嘉其忠方議重用之而龍馭上賓矣宣宗皇帝即位復禮部左侍郎兼職如故洪熙乙巳冬公自南京來朝上素重公及入見顧問良久即留任行在禮部事宣德改元春進尚書是歲秋漢王謀叛事覺公贊上親征事平公受賞賚甚厚復給叛者家屬四人丁未賜誥命授資善

大夫復賜近第一區於長安右門外給閭者二人戊申
上嘉公忠勤特賜銀章四其二曰文恭世家曰清和恭
靜蓋嘉美褒美之也尋以公生辰賜宴於其第秋八月
公扈從巡邊至會州而還己酉命兼詹事府事夏五月
復扈從北巡時常民有豪橫者既抵于法悉以田宅賜
公辛亥命兼行在戶部事聖節御製詩一章賜公及蹇
忠定楊文貞文敏三公且曰朕茂膺天眷惟爾四人贊
翼之功因賜宴盡醉而罷新建禮部成命光祿設宴勲

戚公卿皆往賀公公以為盛事立石廳事之右倚任益隆每燕見上虛心問曰卿有何言得其章奏即施行之時有芝產於公署人以為公和氣所召今上皇帝踐祚亦惟圖任舊人待公尤厚凡軍國重務皆與聞加授資德大夫正治上卿每考績必有賚予甲子以年至七十五章乞致仕上以公精力未衰慰勉留之己巳上親征北邊命公留守京師秋八月進太子太傅階榮祿大夫景泰初賜誥命辛未春公因災異數見乞放免以回天

意不許尋進少傅壬申兼太子太師二俸兼支公固辭
一俸癸酉復賜誥命進階光祿大夫自後每歲引年乞
歸皆不許丙子復因災變乞賜罷黜亦不許時公年八
十二忽疾作艱於步履明年皇上復位公不自勝扶疾
入朝而筋力不可強矣遂乞謝事且辭師傅二職上方
重用耆舊憫其老皆從之陞辭賜白金寶劔金織襲衣
給驛舟以歸復賜璽書有卿宅心允臧處事惟慎雖經
變故無改厥常之諭歸之日鄉人老稚聚觀者以億萬

計公陳所受賜於堂感激泣下遣冢子長寧詣闕申謝
上念公歷事累朝遂官長寧為錦衣衛世襲鎮撫俾歸
終養公之弟克恭克寧克誠時年皆七十餘蒼顏白髮
燕樂於一堂遂扁曰壽愷優游桑梓者七年疾復作召
諸子前曰爾輩圖報國恩勿墜家聲遂瞑目而逝天順
七年八月八日也享年八十有九終之夕常州守卓天
錫夢公來辭已而聞終大以為異計聞上為之震悼贈
太保諡忠安遣官諭祭於其家復令有司營葬事恩榮

始終世莫與比公為人平易寬和廉靜寡慾自奉淡薄起居有常居官敬慎一毫不苟歷事列聖無纖豪過舉蔚然為一代名臣立朝幾六十年薦拔士類甚多十知春闈貢舉天下之士盡出其門平居未嘗疾言遽色雖庸夫孺子亦知其為長者暇則手不釋卷喜為詩文晚年譽望益尊其酬應愈劇曾不厭倦所著有芝軒集若干卷又嘗輯錄醫藥經驗者曰衛生易簡方經進又有律身規鑑俱行於世公配范氏早卒累贈夫人繼張氏

累封夫人子男四人長曰猷即長寧居母喪廬墓有司聞於朝旌其門曰孝子次曰鈇以武舉得官沒於王事次曰礪錦衣衛指揮僉事次曰銅女三人長贊林玘次適成國公朱儀次適陽武侯薛琮孫男一人曾孫男一人銘曰

大明盛時有臣胡公從容其間以篤其忠始為夕郎乃教胄子輿論攸歸多士咸喜作賓春宮遂長春官列聖倚之四海乂安國之老成進位師傅溫恭維人翊我皇

度公在朝廷六十春秋祿位優游莫之匹休公身雖亡
中有不死懿行崇功昭彼信史皇恤耆英曠典是承隧
道有碑儒臣刻銘

吏部尚書致仕贈太保諡文端王公神道碑銘

公諱直字行儉別號抑菴系出瑯琊晉太傅導之後也
導輔東晉遂家金陵後數世有崇文者仕唐為吉州刺
史因家吉州又數世孫贄仕宋為戶部侍郎徙居泰和
代有顯人曾祖以道祖子興隱居不仕父伯貞仕國朝

為肇慶知府俱以公貴累贈少傅兼太子太師吏部尚書妣皆贈一品夫人公早喪母而父以事去賴祖母李夫人撫育自幼端重異於常兒家貧力薄刻苦讀書永樂改元遂領鄉薦明年登進士第時太宗皇帝篤意古學詔選進士曾榮等二十八人為翰林庶吉士俾讀中秘書冀成遠大之器公在選中感激奮志不數年文辭追古作者上以公卓越諸士召入內閣凡機密之政屬執筆焉尋授翰林修撰車駕巡幸北京仁宗為皇太子

監國留務之重選任尤嚴時翰林則留黃淮楊士奇與公三人輔導公夙夜勤慎不懈中外咸倚重之及再幸北京公在扈從遂與修太祖實錄未成以憂去服闋仍入翰林陞侍讀仁宗即位進侍讀學士宣宗為皇太子慎選宮僚首陞公右春坊右庶子仍兼侍讀學士凡經筵講義及文武羣臣誥勅皆以屬公又兼記注至於聖政聖訓之當書者皆錄之以備纂述進階奉議大夫宣宗即位與修兩朝實錄成進詹事府少詹事仍兼侍

讀學士有白金彩幣襲衣寶鑑之資進階中順大夫令
上嗣位詔修先朝實錄以公總裁書成進禮部左侍郎
仍兼學士賞賚如前久之以禮部缺人命公出涖部事
宗伯胡公大喜闔部之政悉付之公處之裕然若素習
者吏部尚書郭璉去位詔以公代之命下士類皆悅進
階資善大夫歷再歲有無賴不得志者以選撥事嫁禍
於公給舍御史交章論列乃直公誣加授資德大夫正
治上卿正統己巳秋北邊告警車駕欲親征公獨以為

不可率廷臣上疏止之不獲特命公留守京師加太子
太保兼吏部尚書尋進階榮祿大夫景泰初進少傅壬
申兼太子太師進階光祿大夫公累疏求退不允天順
改元皇上復位圖任舊人公艱於步履不能朝謁懇乞
休致并辭師傅二職詔特許之賜以璽書有忠清之操
簡於朕懷之語復出白金文綺寶鏤賜之給驛舟以歸
公方面修髯器宇宏偉望之若神仙中人天性嚴重寡
言笑居家儼然及至接人和氣可掬學富才敏詩文清

綴四方求者接踵屢典春闈文衡得人最盛在翰林三十餘年恭勤不怠如一日與王文安公齊名時稱二王又以居第在東稱東王先生士類莫不拭目海內想聞其風采及位冢宰益加廉慎時方面官罷廷臣薦舉專屬吏部公益留意人才委任部屬凡御史出巡歸者必令報其高下以備拔用自是四方多號得人奔競之風為之一息居第隘陋曾不屑意一切世味安於淡薄朝廷重公之德每優禮之免其朝謁及退休居家杜門不出

日課諸孫讀書而已所著有抑菴集若干卷行于世天
順六年九月二十三日以疾終於正寢享年八十有四
計聞上為之悼惜特贈太保諡文端遣官諭祭於其家
復令有司營葬事公配陳氏累封一品夫人先公二年
卒子男四人長曰積翰林檢討居母憂以卒次曰積次
曰穆次曰桐女三人長適梁相次適蕭積次適袁傑孫
男十人曾孫男七人積等卜以天順七年正月六日葬
於邑之信實鄉高坪之原乃以公所為墓誌示賢請銘

其神道賢從公遊最久公未嘗待以屬吏又引之同升
平生之知未有過於公者謹次第其事而系之以銘銘
曰

國之明昌繫彼才賢有一挺生繫豈偶然侃侃王公天
賦其秀有聲熒然大江之右鑿坡鳳閣容與翱翔惟學
之昌惟譽之芳遂秉鈞衡不倚不忒百司庶府位稱其
德位稱其德又我烝民列聖汝嘉保傅師臣公之旋歸
既祿且壽國藉著龜士仰山斗公之云亡軫我聖衷節

惠二名錫命三公有美哀榮無然愧怍銘在豐碑元老之墓

明文衡卷七十八